

事

物

考

事物考卷三

盤屋王三聘輯

國制

國號 班固典引曰肇命人主五德初始厥有氏號
莫不開元于太昊注謂太昊號庖犧炎帝號神農
黃帝號軒轅蓋自太昊而上上以目名未為天下
之號也至太昊始以庖犧為代號云

年號 始自漢武帝建元元年按趙弼考紀元云以
一字紀元者始于漢文帝後元年景帝中元年以
二字紀元者始于武帝建元元年以三字紀元者
始于梁武帝大中通元年以四字紀元者始于漢

哀帝太初元將元年今詳立號以紀元當始文景
非武帝也

幾元 史記曰秦惠文王十四年更為元年自漢唐
至宋元皆踵其失蓋歷代人君即位為元年中間
無改元之制惟 國朝獨能正之

五運 通曆曰太昊木德王始有甲曆五運多轂子
曰五運有二說鄒衍以相勝劉向以相生自伏犧
至顓頊木火土金水相承漢魏以還其遵劉說伏
犧不德神農火德黃帝土德少昊金德顓頊水德
帝嚳木德帝堯火德帝舜土德夏金德商水德周

木德秦水德漢火德魏土德晉金德隋火德唐土德宋火德

色尚 歷代帝王為正各異故所尚不同刑易論語
疏自夏正尚黑推而上之謂伏羲以上未聞謂女
媯尚白神農赤黃帝黑少昊白高陽赤高辛黑陶
唐白有虞赤宜自太昊始也

尊號 項峻始學篇曰天地立有天皇號曰天靈即
帝王尊號之始也秦有天下李斯請上尊號曰泰
皇至唐高宗始稱天皇中宗曰應天皇帝玄宗開
元以後宰相始率百官上尊號以為常制宋神宗

以虛名無實遂罷之也

聖節 明皇雜錄曰唐玄宗八月五日降誕是日宴宰相于花萼樓源乾曜請以是日為千秋節群臣獻萬歲壽酒其後天子誕日節號自茲始也穆宗誕日令天下州府置宴文宗誕日始禁屠宰宋循用 國朝萬壽聖節百官朝賀致詞

視朝 漢書曰宣帝五日一聽事通典曰唐貞觀十三年房喬奏三日一臨朝長孫無忌奏視朝坐日高祖報曰每日常坐後詔五日升太極殿視事朔望即為常式宋五曰一視朝謂之起居 國朝常

日早朝御奉天門午朝御左順門朔望禮節升殿
索扇 唐明皇時蕭嵩為相奏請天子升降俯仰衆
人皆得見之非肅穆之容也凡朔望受朝備羽扇
于殿上將出所司承旨索扇扇合止坐坐定去扇
禮畢上將退又索扇如初

聖旨 格古要論曰秦漢天子稱制詔勅中宮東宮
諸侯王稱令郡守稱教無名為旨者魏晉天子稱
聖旨若曰奉承聖上之旨意而已然則稱旨行事
本取指撝之義以從尋常簡便之稱

傳旨 天順日錄云自太祖相傳列聖臨朝每至日

是不遑暇食。英宗以幼冲即位，三閣老楊榮等慮聖體易倦，因創權制，每日早朝止許言事八件。前一日先以副詣閣下，豫以閣事處分陳上，遇奏止依所陳傳旨而已。迄今遂為定制。

票旨 國朝英宗九歲登極，有詔凡曰于張太后然後行。太后令付內閣議決，具帖開報內閣票旨始此。

朝后 百官命婦入朝，皇后自唐武后始也。

警蹕 周禮夏官隸僕掌蹕，宮中之事注謂止行者。自漢以來，天子出稱警，入稱蹕，注謂奉制出軍者。

皆警戒八國者皆蹕上一曰蹕路也謂行者皆警
于塗路也蓋始于周制

微行 帝王微行自漢武帝始也劉氏曰盧生教始
皇為微行非自漢武帝矣

經筵 國朝景泰初始開經筵是時每講畢命中官
布金錢于地令講官拾之以為恩典天順八年甲
申八月二日憲宗登極御經筵歲率以二八月中
旬起四十月末旬止月三會講日皆逢二

大赦 秦二世即位大赦丘氏曰此後世人君初即
位肆赦之始也

大宴 漢高帝十月長樂宮成置酒宴群臣此錫宴
之始也宋朝南郊畢大宴廣德殿曰飲福宴聖節
後大宴曰次宴 國朝凡大祀天地次日慶成大
宴凡正旦冬至聖節洪武永樂間大宴并如慶成
儀宣德以後朝官不與宴者給賜節錢鈔錠

常宴 宋真宗朝聖節外始備設春秋二宴以為定
制 國朝凡立春元宵四月八端午重陽臘八等
節永樂間賜百官宴于奉天門東宮千秋節宴于
文華殿宣德以後與皇太后壽旦俱出宴于午門
外

避殿 史記曰七國反吳王既敗走景帝詔曰楚王
卬等重逆無道燒宗廟朕素服避正殿則其事始
自漢景帝也孝宣之世亦行其禮秦漢已上未聞
損膳 周禮膳夫掌王食羞王日一舉鼎十有二物
皆有俎齊日三舉大喪大荒大扎天地有戒邦有
大故皆不舉是王不舉者損常膳也蓋自周公制
禮之始故漢文帝微服損膳迄今國有災減日食
避正殿行之為始

輟朝 唐會要曰開元十八年十一月張說薨輟朝
罷元會是自明皇始也太和中崔龜從奏云正觀

中任環卒有司對仗奏聞太宗責其乖禮推是則太宗以來尚未行茲禮也

廊食 唐會要曰正觀四年詔所司于外廊置食一頓五代會要曰唐升平日常參官每日朝退賜食謂之廊食宋起居幕中賜酒饌

賞賜 書曰車服以庸自唐虞即然商功懋懋賞周有車馬器服之等 大明會典曰皇帝登極冊立東宮巡狩親征視學經筵纂修實錄大臣公差考滿患疾致任京官省親節令王府三司慶賀諸番四夷朝貢軍功賞賜用鈔錠胡椒蘇木銅錢銀

兩衣服鞍馬冠帶酒扇條時鮮米蔬等物各有差等

復鄉 漢高祖破英布還過沛復其民後世創業之君復其故鄉自漢高祖始也

賜爵 漢惠帝即位始賜民爵戶一級自後凡初政元率以爲例

優免 周禮卿大夫之職其舍者國中貴者賢者老者服公事者老有疾者皆舍漢之有復除猶周之有施舍皆除其賦役之謂也 國朝有優免差役之例

蠲貸 文獻通考曰漢以來始有蠲貸之事蓋三代之取民田賦而已如下上錯下中三錯之類不嘗立為定法非如後世立為定額雖升合不可懸欠也由唐以來取民愈重其法愈煩故蠲貸之令愈多

登聞鼓 昔堯置敢諫之鼓即其始也用不達上而施千朝登聞東京記曰唐置匭興國九年改為登聞院曰登聞

養濟院 唐會要曰開元中京城乞兒官置坊給食為養病院入分置悲田院于諸寺災困之

院名福田 國朝洪武初令天下置養濟院以處
孤貧殘疾無依者天順元年令收養貧民于順寺
觀從京倉支米煮飯日給二食

官典

廕叙 書臯陶稱舜曰賞延于世則廕叙自有虞氏
始也漢二千石以上視事滿三歲得任同產若子
一人為郎 國初因前代任子之制文武一品至
七品皆廕子一人以世其祿成化三年奏准在京
三品以上官聽令一人送國子監讀書出身若大
臣果有勲勞于國出自特恩錄用子孫者不在此

限

鬻官 沿革曰鬻爵賣官三代無有起于秦漢之權
利通典曰漢文帝納晁錯言令人入粟六百石爵
上造萬二千石為大庶長漢武帝國用空竭募人
入奴婢終身以為郎靈帝懸鴻都榜開賣官路
試職 書曰明試以功唐武后凡舉人無賢不肖咸
加擢拜大置試官宋神宗改官制有行試守三等
試未正命也隋高官卑稱行階卑官高稱守 國
初凡在京初入仕者試職一年御史試職半年考
堪實授

會推 國朝進退入臣皆出于宸斷成化間始有吏部會官推舉之例其權遂歸于內閣

考滿 舜典曰三載考績三考黜陟幽明宋朝以考定勞一歲為考四考而遷 國朝京官歷奉三年五品以下從監察御史考覈吏部覆考各以九年通考四品以上任滿黜陟取自 上裁外官三年考滿給由到部亦以九年通考

休沐 史記李園事春申君謁歸故失期則假告已見于戰國漢律吏得五日一休沐言休息以洗沐也唐永徽三年以天下無虞百司務簡每至旬假

許不視事以寬百僚休沐然則休沐始于漢其以旬休始于唐也 國朝正旦節放假五日冬至三日元宵十日

豁宿 宋朝館閣每夜輪一人直宿如有故不宿則虛其夜謂之豁宿豁宿不得過五日即湏入宿若遇豁宿不到于宿曆書腹肚不安故相傳為害肚曆

致仕 書曰伊尹既復政厥辟告歸于王註謂告老致政事于君此臣下致仕之初也自周乃有大夫七十致仕之禮

策免漢成帝策免大司而許嘉此策免大臣之始
德政碑陸龜蒙曰古者懸而不用不書之以表其
功德因留之不忍去碑之名出是而得自秦漢以
降生有功德政事者亦碑之而易之以石失其稱
矣此德政有碑之起也

生祠漢呼公為縣吏曹決獄平郡中為立生祠自
三代以來無生為立祠者至此始見其事

戒石銘餘冬稿曰今之戒石四句銘爾俸爾祿民
膏民脂下民易虐上蒼難欺舊傳乃宋太宗書以
賜諸郡縣者其辭則摘蜀王孟昶之文也自是天

下始有戒石亭考歐陽集古錄稱唐明皇擇令一百六十三人賜以丁寧之戒其後天下為縣者皆以新戒刻石又知戒石不自宋始蓋唐已有之特不見其辭耳

國用

黃冊 周禮司民掌登萬民之數自生齒已上皆書于版唐武德七年令天下戶每歲一造計帳三年一造戶籍宋州縣有丁口版簿 大明會典曰洪武十四年詔天下府州縣十年一造黃冊以一百一十戶為里催丁多者十戶為長餘百戶為十甲

城中曰坊近城曰廂鄉都曰里每里編為一冊冊首總為一圖鰥寡孤獨不任役者帶管于百一十口之外而列于圖後名曰畸零冊成布政司及府州縣各存一本進戶部轉送南京後湖收架委御史二員戶科給事中一員戶部主事四員監生一千二百名以舊冊比對清查每五日一次過湖瞭曬

賦役 文獻通考曰古者有田則稅之有身則役之無有稅其身者也漢法民年十五而筭出口賦至五十六而除二一而傳給徭役亦五十六而除是

且稅之且役之也漢高祖初為筭賦唐會要曰武
德六年令天下戶量其產定為三等後又為九等
宋為五等 大明會典曰凡各處有司十年一造
黃冊分豁上中下三等入戶仍開軍民宦匠等籍
暨排年里長依次充當外其大小雜泛差役各照
戶分上中下三等入戶點差

春秋魯宣公稅畝唐志曰自開元後租庸調
於代宗始以畝定稅至德宗相楊炎遂作兩稅
法夏秋無過六月秋無過十一月 大明會典曰
每歲初令官田起科每畝五升三合五勺民田每

蘇三升三合五勺沒官田每畝一斗二升

屯田 漢西域傳曰武帝初通西域置校尉屯田于渠犂又桑弘羊奏遣屯田卒益種五穀于張掖酒泉 大明會典曰國初諸將分軍于龍江等處屯田自後徧于天下大率衛所軍士三分守城七分屯種又有二八一九四六中半等例皆隨地而異云永樂五年各按察司增食事一員盤量屯種正統二年提督屯田

水利 沿革曰井田廢溝澮墾水利所以作也通典曰魏文侯使李悝作水利 大明會典曰各處開

壩陂池引水可灌田畝以利農民者務要時常整
理疏浚

漕運 沿革曰秦伐匈奴令天下飛芻輓粟此漕運
之始也 國朝自永樂遷都于北軍國之需仰給
東南漕運之法日益詳備令于淮安用船可載三
百石以上者運入淮河沙河至陳州潁岐口跌坡
下用淺船可載二百石以上者運至跌坡上別以
大船載入黃河至八柳樹等處令河南車夫運通
衛河轉輸北京

晨桑 周禮載桑之宅不毛者用里布注謂宅不種桑

麻者蜀一里二十五家之布。國初令天下農
凡有五畝至十畝者栽桑麻木綿各半畝十畝以
上皆倍之。有司親視不種桑麻木綿者沒出絹麻
綿布各一匹。每畝起科麻八兩綿四兩栽桑者四
年以後徵租。

草料 唐志曰太宗正觀中始稅草以給諸閑

大明會典曰凡各處倉場收積草料以備軍馬往
來支用草于本處照田糧徵收料于秋糧內折納
其後令官軍自採野草備用遂有秋青草事例宣
德以來通命內外軍衛有司量派軍夫採打置場

收納歲有常額與民納草相兼支用

鹽課

呂東萊曰三代之時鹽雖入貢與民共之法

自管仲相桓公始興鹽筴以奪民利至漢武帝時孔僅桑弘羊祖管仲之法鹽始禁榷

大明會典

曰凡天下辨鹽去處每鹽二百斤為一引每歲掇課各有定額客商發賣各照行鹽地方其課專以供給邊方糧餉賑濟水旱凶荒故漢武以來鹽法修作因時漸密

鹽鈔

瑣綴錄曰國朝班戶口食鹽于天下而歲

收其鈔曰戶口鈔蓋以鹽課鈔也今鹽不班已數

世矣而民歲折銀錢戶口鈔如故天下破耗

茶課 唐會要曰德宗貞元九年張滂奏請一出茶

州縣及茶山要路定三等每十稅一 大明會典

曰官給茶引付產茶府州縣凡商人買茶具數赴

官納錢給引每引納錢一千文照茶一百斤茶不

給引者謂之畸零別置由帖付之每茶由一道納

錢六百文照茶六十斤又令陝西四川產茶地方

每十株官取一文若無主者令軍人坼種官取八

分有司收貯于西番易馬

魚課 五季僭偽之時江浙荆湖淮南廣南福建應

江湖及池潭陂塘聚魚之處皆納官錢 大明會典曰各處河泊所辦納魚課米鈔及魚油折納黃麻并魚線膠翎毛

銀課 周官圻人掌金玉錫石之地而為厲禁以守之若以時取之則物其地圖授之唐開元十五年初稅伊陽五重山銀錫 大明會典永樂以後令浙江福建湖廣四川雲南貴州等處銀礦坑場煎辦銀課差御史內官或本處三司提督開閉不時水銀 宋產水銀有秦鳳商階四川置冶以官掌之 大明景泰三年蠲除貴州思印江長官司原額水

銀課其夔川縣松坑銀場每水銀如舊

鑿課 五代以來創務置官吏宋制白鑿出晉汾防
州無為軍汾州之靈石縣綠鑿出慈隰州池州之
銅陵縣各置官典令有鑊戶煮造入官市洪武三
年令廬州府黃墩崑山及安慶府桐城縣歲納鑿
課二十二萬七千斤每三百斤為一引官給工本
錢一百五十文

珠池 五代劉鋹于海門鎮募兵能採珠者二千人
號眉川都凡採珠者必以索繫石被于體而沒焉
深者至五百尺溺死者甚衆後廢未幾復置容州

海渚 大明洪武三十五年差內官于廣東布政司起取瑯戶採珠弘治七年差太監一員看守廣東廉州府楊梅青鶯平江三處珠池兼巡捕廉瓊二府并帶管永安珠池

竹木 唐德宗時趙贊請天下所販竹木茶漆皆什一稅之 大明洪武初于龍江大勝港永樂六年于通州白河盧溝通積廣積俱設局照例抽分客商與販竹木等項

柴炭 月令季秋乃令伐薪為炭 大明會典曰

國初供應柴炭悉于松江蘆洲并龍江海屑二場

取用及永樂遷都于北則白羊口黃花鎮紅螺山
等處採辦官德間始設易州山廠專官總理而派
解運納各有定例

商稅 孟子曰文王之治岐關市譏而不征又曰古
之為市以其所有易其所無有司者治之爾有賤
丈夫焉必求壟斷而登之以左右望而罔市利故
從而征之征商自此賤丈夫始矣此蓋商賈之初
有稅也

酒課 通典曰漢文帝時初權酤沿革曰漢武帝始
權酒酤唐武宗置權麴後唐明宗收麴稅 大明

令凡踏造酒麴貨賣者赴務投稅如造酒貨賣依
例辦納酒課

權醋 魏中書監劉放曰官販苦酒與百姓爭錐刀
之利請停之苦酒蓋醋也醋之有權自魏已然乃
知不特近世也

船料鈔 漢武帝初算舟車令非吏比者三老北邊
騎士輶車一算商賈人輶車二算五丈以上一算
大明會典宣德以來令河西務臨清濟寧徐州楊
州上新河蘇杭湖廣金沙州江西九江設立鈔關
差官監收每船一百料納鈔四十貫或十五貫俱

錢鈔中半兼納

稅錢 漢武帝初筭緡錢令諸賈人末作率緡錢二
十一筭諸作有租及鑄率緡錢四千一筭沿革曰
晉齊梁時凡貨奴婢牛馬田宅有文券者率錢一
萬輸估四百入官賣主三買主一無文券者隨物
所堪亦百分收四名為散估大明令凡買賣田宅
頭足赴務投稅除正課外每契本一紙納工本銅
錢四十文

稅契 稅契始于東晉宋會典曰太祖始收民印契
錢令人典賣田宅輸錢印契稅契限兩月 大明

律曰凡典賣田宅不稅契者笞五十仍追價錢一半入官

寄養馬 國初官馬養于各苑馬寺各監苑而已永樂中始以官茶易和林等處馬養之民間謂之茶馬正德十四年京師有警乃選取以備軍資養于順天府近京屬縣謂之寄養騎操馬及京師無事寄養之馬不復散去至今遂為故事

常平 漢宣帝時數豐稔耿壽昌奏諸邊郡以穀賤時增價糴入貴則減價糴出名曰常平文獻通考曰古今言糴糴飲散之法始于齊管仲魏李悝仲

無主于富國悝專主于濟民後漢明帝欲置倉公卿多以為便劉般曰外有利民之名而內侵刻百姓豪右因緣為姦小民不得其平不便

義倉 通典曰隋文帝時長孫平奏令諸州百姓勸課當社共立義倉唐太宗時戴胄奏言隨天下之人節級輸粟名為社倉又韓仲良奏王公以下應墾田者畝納二升貯之州縣以備凶年賑給百姓始為義倉蓋其事自始也宋朝會要曰建隆四年詔諸州縣各置義倉官所收二稅每石別輸一斗貯之以備凶儉給與人民

國瑞

璽 漢志曰三王彫文詆偽漸興始有璽符以檢姦
萌衛宏曰秦已前民亦以金玉為印龍虎紐秦始皇
天子稱璽又以玉群臣莫敢用也漢志曰璽皆玉
螭虎紐文曰皇帝行璽皇帝之璽皇帝信璽天子
行璽天子之璽天子信璽凡六國朝御寶祀天地
用奉天之寶詔赦聖旨用皇帝之寶立封及賜勞
用皇帝行寶召親王大臣調兵用皇帝信寶祭祀
鬼神用天子之寶封建外夷及賜勞用天子行寶
召外夷調兵用天子信寶一品至五品誥命用制

誥之寶六品七品用勅命之寶又用廣運之寶御
前之寶皇帝尊親之寶皇帝親親之寶敬天勤民
之寶

符 古以竹為之後世以竹不足防偽故以銅鐵金
銀鑄為物象而用之周太公對武王曰主與將有
陰符凡八等漢高祖與功臣剖符作誓文帝為銅
虎符竹使符與郡守發兵隋煬帝為玉麟符與京
師留守唐高祖為銀莧符銅魚符武后為銅龜符
俱起軍旅易守長 國朝銅符承天門承字號東
西北安門東西北字號金吾二十衛守衛官領右

半字留守五衛巡城官領左半字比對相同方許

點開

節 禮記曰凡君召以三節二節以走一節以趨雜錄曰成王掌節守邦國者用玉節守都鄙者用角節凡邦國之使節山國用虎節土國用人節澤國用龍節皆金也以英蕩輔之注杜子春云蕩當帑謂之函器盛此節英蕩蓋函

金版 大明會典云金牌之制面上鑄仁義禮智信五字號下鑄守衛二篆字背鑄凡守衛官軍懸帶此牌等二十四字每三日輪班上直各赴尚寶司

公侯駙馬伯領仁字一號至四十號俱龍形指揮
勳衛領義字一號至五十號俱虎形千戶領禮字
一號至一百五十三號俱麒麟形百戶領智字一
號至三百三十號俱獅子形將軍領信字一號至
一千六十九號俱祥雲形又皇城九門守衛軍與
圍子手各領勇字號銅牌二萬五十五面

令牌 大明會典云金吾二十衛守衛官夜巡領申
字十七號令牌五城兵馬司夜巡領木金土水火
字號令牌各二面

牙牌 大明會典曰凡祭祀入壇陪祀官領圓花牌
陪字一號至三百五十號供事官領長花牌供字
號一號至三百八十號執事人領長素牌執字一
號至一千四百七十號又朝叅駕直官所領牙牌
公侯伯勲字號駙馬親字號文官文字號武官武
字號樂官樂字號

符驗 大明會典云符驗之制上織船馬之狀起馬
者用馬字號起船者水字號雙馬者達字號單馬
者通字號起站船者信字號

鐵券 漢高祖封功臣始制鐵券其內鏤字以金塗
之名曰金書鐵契歷代因之以賜功臣唐昭宗賜
吳越王錢鏐鐵券其制如元高尺餘濶二尺許詞
用黃金商畝一角有斧痕恕本身九死子孫三死
四朝洪武二年制鐵券給賜功臣面刻誥文背鐫
免罪減祿之數字以黃金填之左右二面合一字
號右給功臣左藏內府公一樣高一尺濶一尺六
寸五分二樣高九寸五分濶一尺六寸侯三樣高
九寸濶一尺五寸五分四樣高八寸五分濶一尺
五分五樣高八寸濶一尺四寸五分伯六樣高七

寸五分濶一尺三寸五分七樣高六寸五分濶一尺二寸五分

印七雄之時臣下重始稱曰印秦州縣始有印漢自三公而下有金銀銅三等國朝一品二品銀印三品以下銅印方厚有差

條印通典曰北齊有督攝萬機之印一鈕以木為之唯以印縫合礙合縫條印蓋始于此

珍寶

金格古要論曰南番瓜子金麤皮金皆生金也雲南葉子金西番回回金皆熟金也其性柔而重

其色七青八黃九紫十赤以赤為足色金也說文
曰白金謂之銀

玉 玉出西域于闐國有五色白如酥黃如栗碧如
旋黑如漆紅如鷄冠者最貴菜玉非青非綠如菜
葉此玉色之最低者

珠 南珠出南番海鮮中其色白北珠其色青身分
圓而精光者價高以大小分兩定價

珊瑚 珊瑚樹生海中山陽處水底以鉄網取之其
色如銀硃鮮紅樹身高枝柯多者為勝但有髓眼
及淡紅色者價輕此物貴賤並隨玳瑁枝柯斷者

用釘稍釘定熔紅蠟粘按接宜仔細看之

瑪瑙 出北地南番西番以紅多者為上其中有人
物鳥獸形者最貴有錦花者謂之錦紅瑪瑙有漆
黑中一線白者謂之合子瑪瑙有黑白相間者謂
之截子瑪瑙有紅白雜色如絲相間者謂之纏絲
瑪瑙俱貴有淡水色者謂之漿水瑪瑙有紫紅色
者謂之醬斑瑪瑙有海螵色鬼面花者俱低

水晶 千年冰化為水晶性堅而脆刀刮不動色白
如泉清明而瑩無纖毫瑕玷擊痕者為佳倭國水
晶第一南水晶白北水晶黑信州水晶南凡器皿

貴素但碾花者必有卽病魔假水晶用藥燒成者色暗青有氣眼亦有白色黃青色但不潔白明瑩謂之硝子

玻璃 出南番有酒色紫色白色似水晶器皿背多碾兩點花兒其藥燒者入手輕有氣眼似琉璃

玳瑁 南番大海中大龜背文為玳瑁有黃多黑少者有黃黑相半者其黃如蜜黑如漆最佳其低者黑白不分或黃黑散亂又有龜筒色似玳瑁而無班紋

鶴頂紅 南番大海中有鶴魚頂中鮓紅如血可作

帶號曰鶴頂紅

象牙 南番者長大廣西安南者短小新鋸開粉紅色者最佳雲南麓別出作梳子直者好橫者易斷宋內院作象牙圓毬兒一箇中直通竅內車二重皆可轉動謂之思功毬

骨爲犀 出西番其色如淡碧玉稍有黃其紋理似角扣之聲清如玉磨刮喫之有香燒之不臭能消腫毒及辨毒藥又謂之碧犀最貴

花羊角 出北地黑身白花者高白身黑花者低作刀靶染油不滑

琥珀 松木精液多年化為琥珀出南番西番其色
黃而明瑩潤澤若松香色紅而且黃者謂之明珀
有香者謂之香珀有鵝黃色者謂之蠟珀俱價輕
深紅色者出高麗倭國其中有蜂蟻松枝者可愛
神異 嘗有降真香節內及木節內生成真武像有
石中及蚌中生成觀音像 國朝永樂中造孝陵
碑鑿石于石中得一白石龜今在南京內府奉先
殿正統中貴州硃砂中有生成觀音像

錢 管子曰湯七年旱禹五年水湯以莊山禹以歷
山之金並鑄幣以救人困至周太公立九府圜法

始名以錢錢圓含方輕重以銖其文無見蓋錢文以寶自周景王大錢始也以年自後魏孝文太和始也以通自唐高祖武德始也以重自肅宗乾元始也以元自晉高祖天福始也以鐵為錢自公孫述據蜀始也 國朝洪武初置寶源局于應天府鑄大中通寶錢與歷代錢兼行以四百為一貫四十為一兩四文為一錢又令戶部及行省鑄洪武通寶錢凡五等當十錢重一兩當五錢重五錢當三當二重皆如當之數小錢重一錢

鈔 漢武帝造白鹿皮幣自唐憲宗以來始制為飛

參鈔引之屬以通商賈之厚齎貿易者其法蓋執
券引以取錢而非以參引為錢也宋慶曆以來蜀
始有交子建炎以來東南始有會子自交會既行
而始直以楮為錢矣 國朝洪武八年詔中書省
造大明寶鈔取桑穰為鈔料其制方高一尺濶六
寸以青色為質外為龍文花欄橫題其額曰大明
通行寶鈔內上兩旁後為文八字曰大明寶鈔天下
通行中圖貫狀十串則為一貫折銅錢一千文銀
一兩凡六等曰一貫五百文四百文三百文二百
文一百文

絲 皇圖要記曰黃帝四妃西陵氏始養蚕為絲
布帛 漢志曰上古衣毛而冒皮後聖易之以絲麻
以為布帛蓋自黃帝制也

錦 拾遺曰負嶠山環丘有水蚕霜覆之然後成璽
其色五采唐堯之時海人織錦以獻後代効之染
五色絲織以為錦今蘇州有落花流水錦及各色
錦

繡 正義云舜令禹制繡以五種之彩明施于五色
制作衣服則帝舜始為繡也

五采 後漢志曰後聖觀翬翟之文榮華之色乃染

帛以効之始作五采成以為服易以黃帝堯舜垂衣裳取諸乾坤乾坤有文則五采與衣服同興矣
纈潘氏記聞談曰唐玄宗柳婕妤妹適趙氏性巧因使工鏤板為雜花打為夾纈初獻皇后一匹代宗賞之勅宮中依樣製造當時甚秘後漸出徧天下此似始為制也

刻絲作格古要論曰宋時舊織者白地或青地子織詩詞山水或故事人物花木鳥獸其配色如傳彩又謂之刻色作此物甚難得

紵絲作紵絲作新織者類刻絲作而欠光淨謹厚

不達刻絲多矣

灑海刺

西番出絨毛織者濶三尺許緊厚如氊西

番亦貢

普羅

西番及陝西甘肅出亦用絨毛織者濶一尺

許與洒海刺相似却不緊厚其價亦低

兜羅錦

出南番西番雲南莎羅樹子內錦織者與

剪絨相似濶五六尺多作被亦可作衣服

西洋剪絨單

出西番絨布織者紅綠色年遠日晒

永不退色緊而且細織大小番犬形方而不長又

謂同盆單

西洋布 布其白如雪濶七尺

火浣布 出西域南炎山用大鼠毛織者如染污垢
一臍入火燒之則潔白如故

事物考卷四

鑾駕

鹵簿大駕 炙轂子曰車駕行羽儀導護謂之鹵簿
自秦始有其名後漢胡廣休天子出行鹵大楯也
所以扞敵部伍之次皆著之簿儀其五兵獨以楯
爲名者行道之時甲楯居外餘兵在內故但言鹵
簿五禮精義曰大盾領一部之人故名鹵簿

國朝凡正旦冬至聖節三大朝會兵部車駕司會
同錦衣衛陳鹵簿大駕千殿之東西九郊祀耕籍
田幸太學俱用鹵簿大駕若祭社稷太廟山川鹵
簿內去白澤旗以下至玄武豹尾大京步輦至大

輅不設餘同出會典

丹陛駕 國朝常日奉天門早朝設丹陛駕于午門外及金水橋單龍戟雙龍戟班劔梧杖儀刀立瓜卧瓜鐙杖金鉞骨朶各三對單龍扇雙龍扇各二把黃蓋傘黃曲柄傘各二把五方傘五把鳴鞭四條弓矢五十副如郊祀前期視牲亦用此駕御座 國朝每旦常朝御奉天門其御座謂之金臺既升座錦衣力士張五繖蓋四圍扇聯翩自東西陛升立座后左右內使一執蓋升立座上一執武備雜二扇立座后正中蓋武備出兵仗局所供一

柄三刃而圓以鐵線裹以黃羅袂如扇狀用則線
圓自落三刃出高所以防不虞也天順間命力士
執繖扇夾立于金水橋南止留座上之繖及夾武
備二扇耳而坐上繖遇風勁時則去之 出瑣綴錄
象 漢凶簿象策在前晉作大車駕之以試橋梁宋
朝象亦作先則象之先導自漢始也

旗 通典曰黃帝設五旗夏后奚仲為車正建旗旂
旒以別尊卑等級也 國朝凶簿有肅靖金鼓白
澤門旗黃旗龍旗日月風雲雷雨金木水火土二
十八宿北斗五岳四瀆青龍白虎朱雀玄武天鹿

天馬鸞麟熊羆旗共一百二十五面

素 後魏有素頭宋有阜素 國朝有紅素縣阜素二

把

節 周禮六節漢文帝制旄節隋制金節八 國朝

鹵簿紅節一對響節十二對金節三對

豹尾 通典曰漢制大駕出最後一乘懸豹尾唐真

觀後始加此車于鹵簿內 國朝鹵簿有豹尾一

箇竿上龍頭頂蓋垂鈴串珠中垂豹尾又有豹尾

二對制同

誕馬 漢輿駕有輿馬三宋導駕有御馬分左右

國朝鹵簿有誕馬二十四疋

黃麾 古今註曰麾所以指麾通典曰黃帝振兵設
五旗五麾漢鹵簿有前後黃麾 國朝鹵簿有黃
麾一對

旛 國朝鹵簿有絳引旛五對傳教旛五對告止旛
五對信旛五對

麾 宋朝會要曰麾本緝鳥毛爲之齊有青麾赤麾
之制 國朝鹵簿有儀鎰麾十對戈麾十對戟麾
十對以五色羅袋縫成麾

戟 父戟之遺象也父前驅之器周制也後以赤油

韜之亦謂之油戟亦曰祭戟 國朝鹵簿有龍戟
三對方天戟十六對

班劍 宋會要曰本漢朝服帶劍取五色班蘭之義
開元禮義纂曰漢制朝服帶劍晉代之以木謂之
班劍宋齊謂之象劍 國朝鹵簿有班劍三對以
木爲之

儀刀 二儀實錄曰儀刀東晉多虞遂以木代之以
備威儀即衙刀也宋會要曰銀飾王公亦給
國朝鹵簿有儀刀三對以木爲之貼金龍文爲飾
與班劍同

金鉞 宋會要曰儀鎧鉞屬也秦漢有之唐用爲儀
仗古今註曰秦改鐵鉞作鎧 國朝鹵簿有金鉞
三對以木爲之

幢 國朝鹵簿有羽葆幢五對青龍白虎朱雀玄武
幢四把

鳴鞭 宋會要曰唐及五代有之周官條狼氏執鞭
趨避之遺法也 國朝鹵簿有鳴鞭四條

傘 宋會要曰繖古張帛避雨之制今有方繖大繖
則是繖之制始自古張帛也 國朝鹵簿有紫方
繖四把紅方繖四把曲柄紅綉繖四把黃綉繖二

把黃羅綉九龍徽一把直柄黃綉徽四把紅綉徽
四把銷金徽青紅黃白黑各三把黃羅銷金九龍
徽一把黃油綃銷金兩徽一把

扇 商高宗有雉雉之祥章服多用翟羽周王后夫
人有雉羽扇漢乘輿服之宋孝武時詔王侯鄣扇
不得用雉尾 國朝有朱團扇紅繡四方扇十二
把紅繡花扇十二把單龍扇紅黃各十把雙龍扇
紅黃各二十把素扇紅黃各二十把毒扇二把
輅 商曰大輅周制五輅金玉象革以飾諸木木無
飾後漢加幘文晉兩廂加鷗翅亦謂鷗車

國朝鹵簿有玉輅大輅各一乘

馬輦 秦始皇始駕六馬記曰天子駕六馬春秋公羊亦云天子駕六疑周制也 國朝鹵簿有大馬輦一乘小馬輦一乘

步輦 隋制輦而不施輪以人荷之注云人牽爲輦正義曰秦始皇去其輪而與之漢代遂爲人君之乘 國朝鹵簿有步輦一乘大京步輦一乘

爵祿

封建 沿革曰黃帝分州畫野得百里之國萬區唐虞列爲五等此封建之始也禮制文嘉曰殷爵

等周五等或謂黃帝立五等也

品秩 自太昊以龍紀官唐虞建官惟百未分品秩
周官以九儀正邦國自一命至九命漢自中二千
石止二百石魏陳群立九品官人之法北齊九品
各分正從 國朝正一品太師太傅太保從一品
少師少傅少保太子太師太傅太保正二品太子
少師少傅少保正三品太子賓客不專授但爲大
臣加官兼官及贈官其餘官品俱見內外官職中
入流 通典曰隋制九品自太師始焉謂之流內
國朝正從一品至九品謂之入流即流內也

未入流 通典曰唐有流外勳品自諸錄事及下
內史始焉 國朝九品之外雜職官員謂之未入
流卽流外也

文散官 漢諸侯有功德優盛朝廷所敬異者賜位
特進三公下隋文帝以爲散官今正一品初授特
進榮祿大夫陞授特進光祿大夫漢有光祿大夫
今從一品初授榮祿大夫陞授光祿大夫正二品
初授資善大夫陞授資政大夫加授資德大夫宋
太宗改通議爲通奉今從二品初授中奉大夫陞
授通奉大夫加授正奉大夫隋散官有通議正議

大夫今正三品初授嘉議大夫陞授通議大夫加授正議大夫秦有中大夫大中大夫今從三品初授亞中大夫陞授中大夫加授大中大夫正四品初授中順大夫陞授中憲大夫加授中議大夫隋散官有朝議朝請今從四品初授朝列大夫陞授朝議大夫加授朝請大夫唐有奉議郎今正五品初授奉議大夫陞授奉政大夫從五品初授奉訓大夫陞授奉直大夫正六品初授承直郎陞授承德郎隋有承務郎宣德郎今從六品初授承務郎陞授儒出身儒林郎吏才幹出身宣德郎唐有宣

義郎宋有承事郎今正七品初授承事郎陞授儒
出身文林郎吏才幹出身宣義郎隋有徵仕郎今
從七品初授從仕郎陞授徵仕郎正八品初授迪
功郎陞授脩職郎從八品初授迪功佐郎陞授脩
職佐郎正九品初授將仕郎陞授登仕郎從九品
初授將仕佐郎陞授登仕佐郎初授散官俱于三
年之後照例陞授其加贈考驗本人生前功績合
得加授者照例給與

武散官 周禮天子六軍軍萬二千五百人其將皆
命卿蓋在國稱大夫在軍稱將軍自晉駸公作三

軍而公將上軍故有將軍之名今為散官正從一品同文官正二品初授驃騎將軍陞授金吾將軍加授龍虎將軍從二品初授鎮國將軍陞授定國將軍加授奉國將軍正三品初授昭勇將軍陞授昭毅將軍加授昭武將軍從三品初授懷遠將軍陞授定遠將軍加授安遠將軍正四品初授明威將軍陞授宣威將軍加授廣威將軍從四品初授宣武將軍陞授顯武將軍加授信武將軍正五品初授武德將軍陞授武節將軍從五品初授武畧將軍陞授武毅將軍正六品初授昭信校尉陞授

承信校尉從六品初授忠顯校尉陞授忠武校尉
文勲 周禮王功曰勲齊梁始有勲品本酬戰士其
後漸及朝流楚寵官有上柱國唐以爲勲官今正
一品左右柱國從一品柱國正二品正治上卿從
二品正治卿正三品資治尹從三品資治少尹正
四品贊治尹從四品贊治少尹正五品脩正庶尹
從五品協正庶尹凡文官一品至五品應合授勲
者照依散官定擬奏聞給授

武勲 後魏有柱國大將軍今正從一品同文勲秦
有護軍都尉唐改上大將軍爲上護軍大將軍爲

護軍今正二品上護軍從二品護軍漢武帝置輕
車將軍唐置上輕車都尉及輕車都尉今正三品
上輕車都尉從三品輕車都尉漢武帝置騎都尉
唐置上騎都尉今正四品上騎都尉從四品騎都
尉隋置文散官爲驍飛雲武四騎尉今正五品驍
騎尉從五品飛騎尉正六品雲騎尉從六品武騎
尉凡武官一品至六品應合授勳者照依散官定
擬奏聞給授

封贈 武王克商追王太王王季故後代有追謚追
尊之典兩漢逮今人臣亦有追贈之制漢宣帝思

張賀掖庭收養封恩德侯此追封之始也 國朝

凡文官一品贈三代二品三品二代四品至七品
一代各照見授職事依例封贈土官無封贈父祖
例止給本人誥勅一品玉軸四軸二品犀軸三品
抹金軸俱三軸四品抹金軸五六七品俱角軸二
軸五品已上授誥織用五色紵絲其前織文曰奉
天誥命用制誥之寶六七品授勅織用純白綾其
前織文曰奉天勅命用勅命之寶俱用升降龍文
左右盤繞王從一品曾祖母祖母母妻各封贈一
品夫人正從二品祖母母妻各封贈夫人正從三

品各封贈淑人正從四品母妻各封贈恭人正從
五品宜人正從六品宜人正從七品孺人曾祖妣
加太字按漢崔篆母師氏通經學百家言王莽寵
以殊禮賜號義成夫人如淳云列侯子復爲列侯
母稱太夫人蓋漢制也

宗室祿米 親王唐制歲該米四千八百石絹肆千
八百疋綿四百五十斤宋制領節度使歲該穀二
千四百石錢四千八百貫絹二百疋綾一百疋羅
十疋綿五百兩今定米一萬石郡王唐制歲該米
七百石田六十頃宋制領觀察使歲該米一千二

百石錢二千四百貫絹二十疋綿五十兩今定米
二千石鎮國將軍唐制歲該米六百石田五十頃
宋制郡王子以下量材授官照官品高下給祿今
定米一千石輔國將軍唐制歲該米五百石田四
十頃今定米八百石奉國將軍唐制歲該米四百
石田二十五頃今定米六百石鎮國中尉唐制歲
該米三百石田十四頃今定米四百石輔國中尉
唐制歲該米二百石田八頃今定米三百石奉國
中尉唐制歲該米一百石今定米二百石公主及
駙馬食祿二千石郡主及儀賓食祿八百石縣主

及儀賓食祿六百石郡君及儀賓食祿米四百石
縣君及儀賓食祿米二百石俱米鈔兼支

公侯伯俸給 漢艾亡秦大侯不過萬家小者五六
百戶則封國以戶也唐封公侯無國土其加實封
者則食其所封之戶分食諸郡以租庸調給

洪武初給官田量原定糧租分數收取後令公侯
伯皆給祿米論功定數舊賜田還官永樂二年令
照文武官例米鈔兼支

文武官俸給 唐正元四年定百官月俸僖昭之亂

國用空闕天祐中止給其半後唐孔謙以重儲下

充請減半數而支實錢宋定非兼職皆一分實錢
二分折支 大明定文武官俸正一品月支米八
十七石從一品月支米七十四石正二品月支米
六十一石從二品月支米四十八石正三品月支
米三十五石從三品月支米二十六石正四品月
支米二十四石從四品月支米二十一石正五品
月支米十六石從五品月支米十四石正六品月
支米十石從六品月支米八石正七品月支米七
石五斗從七品月支米七石正八品月支米六石
五斗從八品月支米六石正九品月支米五石五

斗從九品月支米五石俱米鈔兼支未入流月支米三石

吏員俸米

筆談曰天下吏人素無常祿惟以受贓

爲生熙寧三年始制天下吏祿而設重法以絕請託
國朝五府提控六部都察院都吏布政司通
吏月支二石五斗五府掾吏六部都察院通政司
太常光祿太僕寺應天順天府布政司都司衛各
令史大理寺胥吏國子監鴻臚寺府庫局司牧局
顏料局各府各司吏都察院太醫院各典吏按察
司鹽運司各書吏月支二石五府六部大理光祿

太僕寺國子監應天順天府布政按察鹽運都司
衛各典吏十三道巡按各書吏翰林院光祿寺各
署欽天監司厯太常祠祭署織染皮作鑄印惠民
雜造鞍轡軍器抄紙印鈔寶源局內府庫石灰關
各牧監會同館寶鈔鹽課龍江提舉司典牧營膳
孳牧孳牲紀善典膳奉祀典寶審理工正良醫典
儀理問千戶所五城兵馬布政按察鹽運斷事衛
鎮撫長史司州縣合司吏月支一石俱米鈔兼支

官職

在京文武衙門

宗人府

周有宗正漢置官以序九族

國初置太

宗正院洪武二十二年改院爲府設宗人令左右宗正左右宗人俱正一品首領官經歷司經歷正五品職專玉牒譜系之事初以親王領府事後但以勲戚大臣掌之而不備官

六部 國初因元制置中書省設左右丞相等官天下政事皆由之而出其屬有四部分治錢穀禮儀刑名營造之務洪武元年始定吏戶禮兵刑工六部俱正三品衙門仍屬中書省十三年中書省革去六部尚書爲正二品左右侍郎二員正三品首領官司務廳司務從九品屬官郎中一員正五品

負外郎一員從五品主事正六品按秦少府遣吏四人在殿中主發書謂之尚書漢光武始分尚書為六曹秦以郎為內侍故曰侍郎隋煬帝于六曹各置侍郎一人秦以郎侍衛居中故曰郎中隋文帝于尚書二十四司各置負外郎一人謂本負之外復置郎也後魏于尚書諸司置主事令史隋煬帝但曰主事皆吏長之名也

吏部 漢成帝置常侍曹光武改為吏部今尚書即周天官卿也侍郎即周少宰也所屬有四清吏司曰文選因隋選部今掌天下文吏班秩品命曰驗

考
十三
封因唐司封今掌邦之封爵曰稽勲因周司勲今掌邦國官人之勲級曰考功因魏今掌文職官吏考課

戶部 吳有戶部今尚書即周地官卿也侍郎即周小司徒也首領官照磨所照磨一員正八品檢校一員正九品所屬隋曰民部魏曰度支金部倉部今改為浙江江西湖廣陝西廣東廣西山東山西福建河南四川雲南貴州十三清吏司各掌一布政司戶口錢糧仍量繁簡帶管直隸州縣每司內分民度金倉四科以領其事

太倉 秦漢大司農屬官有太倉令丞唐玄宗以監察御史充太倉出納使梁啟曰如京使取詩如坻如京之義今屬戶部郎中員外郎主之

戶部所屬 寶鈔提舉司提舉一員正八品寶鈔廣惠庫收各處解到鈔錢廣積收紵絲綾羅硝黃等物贓罰庫收籍沒官民家財追沒官吏贓物并錢鈔紵絲綾羅紬絹氈氍鐵皮綿布衣服花絨等物甲字庫收布疋顏料乙字庫收紵絲綿布胖襖袴鞋毛襖等物丙字庫收綿花絲綿等物丁字庫收銅鐵皮張蘇木等物戊字庫收軍器胡椒等物各

大使正九品各副使從九品寶盈庫收貯絲紗羅綾綿紬絹布疋等物御馬倉南京龍江鹽倉檢校批驗所張家灣檢校批驗所抄紙局印鈔局各大便副使俱未入流

禮部 漢成帝置客曹隋爲禮部今尚書即周春官大宗伯卿也侍郎即周小宗伯也所屬有四清吏司曰儀制因魏儀曹今掌舉其儀制而辨其名數曰祠祭因晉祠部今掌祭享天文漏刻國忌廟諱卜筮醫藥道佛之事曰主客因周官今掌諸蕃朝貢等事曰精繕因北齊膳部今掌邦國牲豆酒膳

辨其品數

禮部所屬

鑄印局大使一員副使一員俱未入流

教坊司唐高祖置內教坊武后改爲雲韶府以中
官爲使宋以伶人又次者爲之今設奉鑾一員正
九品左右韶舞左右司樂各二員俱從九品

兵部 魏置五兵隋爲兵部今尚書即周夏官大司
馬卿也侍郎即小司馬也所屬有四清吏司曰武
選因魏五部郎曹今掌天下武職班秩品命職方
因周官今掌天下地圖及城隍鎮戍烽堠之政曰
車駕因魏駕部今掌邦國輦車及天下傳驛廐牧

曰武庫因魏庫部今掌邦國戎器儀仗辨其出入之數

兵部所屬 會同館大使一員正九品副使二員從九品南京典牧所提領一員正八品大使一員正九品典史一員大勝關大使一員副使一員俱未入流

刑部 宋置都官隋爲刑部今尚書即周秋官大司寇卿也侍郎即周小司寇也照磨檢校品與戶同司獄司司獄六員從九品古屬有四曰憲部比部司門部都官部今改爲浙江等十三清吏司各掌

一布政司刑名仍置繁簡帶管直隸州縣并在京衙門每司分憲比司門都官四科以領其事

工部 晉有起部隋爲工部今尚書即周冬官大司空卿也侍郎郎周小司空也所屬有四清吏司曰營繕今掌經營興造衆務曰虞衡因周禮虞衡之官今掌天下山澤而辨其時禁曰都水因隋水部今掌天下陂池川瀆政令曰屯田因晉今掌天下屯種政令

工部所屬 營繕所所正正七品所副正八品所丞正九品文思院唐有文思院宋始掌工巧之事以

時文思索故工作之所號之織染所皮作句顏料
局鞍轡局寶源局大使俱正九品副使軍器局大
使俱從九品副使未入流大通關提舉司龍江提
舉司提舉俱正八品副提舉俱正九品典史押分
竹木局大使副使俱未入流

都察院 周官有御史秦有御史大夫漢御史臺有
中丞以其別在殿中掌蘭臺秘書外督部刺史內
領侍御史北齊後周不置大夫而以中丞爲臺主
唐分爲左右臺大夫漢武帝始有侍御史魏文帝
始遣御史召殿中隋文帝始有監察御史宋爲御

史臺其屬有三院一曰臺院知雜御史爲侍御史
隸焉二曰殿院言事官爲殿中侍御史隸焉三曰
察院六察官爲監察御史隸焉 國初置御史臺
後改爲都察院設左右都御史正二品左右副都
御史正三品左右僉都御史正四品職專糾劾百
司辨明冤枉提督各道及一應不公不法事首領
官經歷正六品都事正七品照磨檢校各一員司
務二員司獄六員品同戶刑其屬浙江等十三道
監察御史正七品凡遇刑名各照道分送問發落
御史差委 國朝宣德二年差御史各處清軍天順

二年奏准三年更替正統元年差御史提督南北直隸學校三年差御史巡視鹽課十三年差御史巡視京城成化三年差御史于陝西巡茶一年更代凡差委御史出巡追問審理劾卷等事都御史具事日請 旨點差

巡撫 永樂間遣尚書侍郎少卿等官鎮守景泰間因與巡按不相統屬難以行事定爲都御史巡撫兼軍務者加總督贊理掌糧餉者加總督兼理他如整飭邊備提督邊關及撫治流民等項皆隨事異名若邊境有事又有總督提督總制各督贊理

及經畧巡視之名近例尚書侍郎治事于外者兼都御史以便行事事畢而罷

通政使司 唐虞納言官也今通政使正三品左右通政正四品左右叅議正五品職專出納帝命通達下情關防諸司出入公文奏報四方臣民實封建言陳情伸訴及軍情聲息災異等事首領官經歷正七品知事正八品

大理寺 黃帝立后土辨乎北方故為李理官也舜命臯陶作士士理官也秦置廷尉漢因之景帝復為大理取天官貴人之牢曰大理之義梁為秋卿

後魏置少卿晉置丞唐因之今卿正三品左右少卿正四品左右寺丞正五品首領官司務從九品其屬左右二寺左右寺正正六品即秦廷尉正也左右寺副從六品左右評事正七品因隋官也職專審錄天下刑名凡刑部都察院司道罪有出入者依律照駁事有冤枉者推情辨明

太常寺 周禮春官職也秦曰奉常王者旌旗盡日月大事則建以行禮官主奉持之漢改曰太常尊大之義也後漢有卿隋有少卿秦有丞今卿正三品少卿正四品寺丞正六品職專祭祀之事首領

典簿正七品因漢官也屬官博士正七品因秦官也協律郎正八品因後魏也法真禮郎正九品因漢治禮郎也司樂從九品神樂觀提點正六品知觀從八品犧牲所吏目從九品隋有郊社令漢文帝有籍田令唐有陵臺令今天地壇山川壇籍田孝陵長陵獻陵景陵祔陵茂陵各祠祭署奉祀各一員俱從七品祠丞各一員俱從八品

鴻臚寺 周官大行人秦爲典客漢改曰鴻臚鴻臚傳之也傳聲贊道也隋有丞唐有主簿今卿正四品左右少卿從五品左右寺丞從六品首領主

簿從八品屬官司儀署司賓署署丞正九品鳴贊序班俱從九品職專朝儀宣贊等事

光祿寺

漢有光祿勳梁改光祿卿今卿從三品少

卿正五品寺丞從六品職專膳羞宴享等事首領典簿從七品錄事從八品屬官大官珍羞良醢掌醢四署署正俱從六品署丞俱從七品監事俱從八品司牲司司牧局大使俱從九品副使俱未入流

太僕寺

洪武初置太僕寺在滁州置北平遼東陝

西甘肅爲行太僕寺永樂間改北平稱太僕寺正

統間定滁州為南京太僕寺按周官有太僕秦漢有丞梁有主簿今卿從三品少卿正四品寺丞正六品職專牧馬之事首領主簿從七品常盈庫大使未入流行太僕寺官品同

尚寶司 漢有符節令位次中丞領上符璽唐武后改為符寶郎今卿正五品少卿從五品司丞正六品職專寶璽符牌等事

國子監 國子周制也晉武帝初立國子學隋煬帝改為監凡官名祭酒皆一位之元長古者得主人饌則老者一人舉酒以祭地故以祭酒為稱周封

兄弟同姓成王時彤伯為祭酒主親屬秦漢因之
晉武帝始制國子祭酒國子博士助教隋煬帝置
司業取樂正司業之義亦置監丞北齊置主簿今
祭酒從四品司業正六品絕愆廳監丞正八品博
士廳五經博士典簿廳典簿俱從八品典籍廳典
籍從九品掌饌廳掌饌未入流率性脩道誠心正
義崇志廣業六堂助教俱從八品學正正九品學
錄從九品職專教化之事

翰林院 學士之稱始自漢晉而命官起于宋齊唐
明皇始置翰林院改供奉為學士禁中亦有侍講

侍讀學士至宋真宗始置二職于翰林明皇始置
史館修撰編修今學士正五品侍講侍讀學士從
五品首領掌孔目未入流屬官侍講侍讀正六品
五經博士正八品典籍從八品侍書正九品待詔
從九品中書修撰從六品編修正七品檢討從七
品職專制誥史冊文翰等事庶吉士永樂間選二
甲三甲中進士爲庶吉士隸本院命學士教之學
業成者二甲除編修三甲除檢討餘除科道部屬
翰林陞用 雙溪雜記云自來陞用六部堂上官不
拘出身何衙門初無內閣禮部必用翰林出身人

之例成化弘治以來吏部必用翰林一人禮部非翰林出身者不得陞入由是翰林人多陟顯要矣
太學士 學士無大稱唐中宗欲以宗寵大臣乃有一太學士之名唐至五代有文明殿太學士爲宰相兼職宋真宗寵王欽若罷政特置資政殿學士班在翰林上今設華蓋殿武英殿文華殿文淵閣東閣太學士俱正五品班在本院學士上永樂初簡命編修等官於文淵閣參預機務謂之內閣漸陞至學士等官洪熙元年以輔導任重加陞至師保及各部尚書侍郎職銜仍兼學士太學士又添設

證齊雜考學士以從或由他官入閣辦事亦有兼
學士太學士唐末有閣門使今閣門使正六品武
英親王天門右順門待詔從九品

內閣權重 項綴錄云 國初不設宰相宋樂初乃設內閣選翰林六七臣居之職知制誥日備顧問參決政機隱然相職而官不過學士洪熙初始陞孤卿皆潛邸舊人

詹事府 秦官漢因之掌太子家唐始置少詹事一人以貳詹事今詹事正三品少詹事正四品府丞正六品首領主簿正七品錄事從九品屬官通事

舍人按漢司隸屬有功曹從事史兼錄衆事三書
有通事舍人

左右春坊 周太子官有庶子唐始置太子諭德中
允贊善漢丞相府置司直今左右庶子俱正五品
左右諭德從五品左右中允正六品左右贊善左
右司直郎俱從六品左右清紀郎從八品左右司
諫從九品

司經局 國語曰勾踐爲夫差洗馬如淳曰前驅也
晉太子詹事屬官有洗馬八人掌太子圖籍經書
漢蘭臺東觀藏書有校書之職後以郎居其任故

謂校書郎元魏始命爲官齊集書省有正書官北齊始爲正字今先馬從五品校書正九品正字從九品凡本府官皆以東宮輔導侍從爲職

中書科 秦始置中書謁者漢元帝去謁者字魏文帝改秘書省爲中書省今爲中書令置通事郎後改爲中書侍郎隋文帝中書令與侍中知政事爲宰相舍人本周官掌平宮中之政晉初置中書舍人 國初中書省設置省舍人後革省爲科定中書舍人從七品職專書寫詔勅冊等事

六科 古諫官秦有諫大夫後漢有諫議大夫唐分

爲左右武后置左右補闕拾遺宋太宗改爲左右
司諫正言秦漢別有給事黃門之職後漢有給事
黃門侍郎左右給事中有有事殿中故曰給事中
今設吏戶禮兵刑工六科爲諫官每科都給事中
正七品左右給事中給事中俱從七品職專叅駁
糾劾等事

六科廊 國朝六科本與尚寶司相鄰今工部委官
製衣處猶稱六科廊是也永樂間失火遷出午門
外今遂爲定居

近侍 菽園雜記云翰林院尚寶司六科官在前常

朝俱在奉天門上御座左右侍立故云近侍今在門下御道左右云是太宗晚年有疾因女官扶持上下因退避居下遂爲定位

行人司 周官有行人今設司正正七品左右司副從七品行人正八品職專冊封葬祭宗室及出使外夷等事

太醫院 周有醫師上士下士秦漢少府屬有大醫令丞元置太醫院有使副判各一員今設院使正五品院判正六品首領吏目從七品屬官御醫正八品職專診視疾病脩合藥餌等事 所屬惠民

藥局生藥庫大使副使俱未入流

欽天監 少昊鳳鳥氏爲曆正夏曰大使周禮春官
有保章氏夏官有挈壺氏唐改司天監唐有少監
宋置大使正唐有五官正靈臺郎今設監正正五
品監副正六品首領主簿正八品屬官春夏秋冬
冬官正正六品五官靈臺郎從六品五官保章正
正八品五官挈壺正從八品五官監候五官司曆
俱正九品五官司晨漏刻博士俱從九品職專曆
數天文地理之事

上林苑監 漢武帝始起上林苑隋置宮苑總監唐

置宮苑使 國朝永樂五年置左右監正正五品
左右監副正六品左右監丞正七品首領典簿正
九品蕃育嘉蔬良牧林衡四署典署正七品署丞
正八品錄事正九品職專苑囿蕃牧種植等事
五城兵馬指揮司 宋以四廂都指揮使巡警京城
神宗置勾當左右廂公事民間謂之都廂今指揮
正六品副指揮正七品首領吏目未入流職專京
城巡捕等事

京府 周成王命君陳尹東郊漢武帝更右內史為
京兆尹秦置郡丞漢設治中一人居中治事主衆

曹文書宋太祖諸州置通判唐節度等使皆有推
官唐高祖有檢校梁州諸軍事今南京應天府洪
京順天府府尹正三品府丞正四品治中正五品
通判正六品推官從六品首領經歷從七品知事
從八品照磨從九品檢校未入流司獄從九品

所屬衙門

隋有州博士唐德宗改為文學宋神宗

于諸大郡府始置教授一人掌教導諸生今儒學
教授一員從九品訓導六員未入流都稅司宣課
司各門稅課司織染局草場大使俱從九品副使
俱未入流各門分司副使倉通運所金銀場鐵冶

批驗所大使副使俱未入流

京縣 南京上元江寧二縣北京大興宛平二縣知
縣正六品縣丞正七品主簿正八品典史未入流
公侯伯 唐虞輯五瑞爵有公侯伯子男隋文帝始
封功臣爲國公唐代宗以射主軍清難始賜名賢
應功臣 國初封功臣爵有五等後革子男其封
公侯伯者皆給誥券或世襲或不世襲以功高下
爲等

駙馬 駙馬非正駕車者皆爲駙馬一曰附近也
也漢武帝置駙馬都尉以假功臣戚屬晉尚公主

者始加之今公主婿皆稱駙馬都尉賜誥命

五府

晉爲都督諸軍事

國初置統軍大元帥

改樞密院又改爲大都督府洪武十三年始分中

左右前後軍都督府設左右都督正一品都督同

知從一品都督僉事正二品首領用文職經歷從

五品都事正七品各府分管在京在外衛所戰導

軍旅之事初以公侯伯爲之後或掌府事都督僉

書軍政所屬都司二十一處留守司一處內外衛

四百九十一處守禦屯田群牧千戶所三百一十

一處儀衛司三十三處宣慰司二處招討使司一

處宣撫司六處安撫司十六處長官司七十處番
夷都司衛所等四百七處

禁衛 周有虎賁氏漢京師有南北軍掌理禁衛又
有羽林郎武帝更秦中尉為執金吾唐置神策神
武等軍五代後唐有侍衛親軍禁軍號控鶴年多
者號寬衣控鶴宋改為天武今在京親軍不屬府
者惟錦衣衛旗手衛府軍衛府軍左右前後四衛
金吾左右前後四衛羽林左右前三衛燕山左右
前三衛虎賁左衛大興左衛濟陽濟川通州三衛
共二十二衛後又設騰驤左右武驤左右四衛亦

三
二七
係親軍并武功中左右永清左右彭城長陵景陵
獻陵裕陵茂陵衛俱不屬府

錦衣衛 唐置營幕使宋置儀鑾使 國初置儀鑾
司後罷司置衛統軍同諸衛而所隸又有將軍力
士校尉人等職掌直駕侍衛巡捕等事其任遇漸
加視諸衛獨異首領鎮撫司問理本衛刑名成化
十四年始增鑄印信各為一司經歷用文職掌本
衛文移出入所屬錦衣中左右前後五所又分鑾
輿擎蓋扇手旌節番幢班劒斧鉞戈戟弓矢馴馬
十司統領校尉掌鹵簿儀仗及直駕等人直宿等

事上中左右前後中後親軍七所分管力士軍匠
又馴象所領本衛軍奴養象以備朝會陳列及駕
輦駢寶之用

旗手衛 國初置旗手千戶所後陞爲衛掌大駕金
鼓旗纛統領隨駕力士及宿衛等事

京衛武學 宋神宗始就武成王廟側建武學如太
學儀 國朝京師建武學儲養京衛幼官與子弟
未襲職者設教授一員從九品訓導六員未入流
南京文武衙門 南京在洪武間爲京師自永樂定
都于此因名南京文武官並置在南京者與北京

同但加南京二字

南京衙門牌扁 璣綴錄曰南京文武各衙門俱有
牌扁直書衙門之名惟翰林院三字橫列而兵部
獨無相傳洪武間一夕潛有掣去之者詰旦具聞
上不之省蓋以示去兵之意至今不敢復揭

官職 在外交文武衙門

十三省承宣布政使司 唐有叅知政事宋下宰相
一等元尚書省亦置爲宰相之貳行省亦有左右
叅政唐高祖有檢校隋改都令史爲都事今左右
布政使從二品左右叅政從三品左右叅議從四

品首領經歷司經歷從六品都事從七品照磨所
照磨從八品檢校正九品理問所理問從六品副
理問從七品提控案牘未入流各省所屬庫雜造
織染局大使副使陝西四川茶馬司洪武初令陝
西洮州河州西寧各設茶馬司收貯官茶每三年
一次差在京官選調邊軍齎捧金牌信符往附近
番簇將運去茶馬給與邊軍騎操大使正九品副
使從九品廣西裕民司雲南滇池魚課司大使副
使俱未入流

各府 秦罷侯置守漢景帝更名太守王莽改曰大

尹今知府一員正四品同知正五品通判正六品
添設無定員推官一員正七品首領經歷正八品
知事正九品照磨從九品檢校未入流所屬司獄
司司獄從九品儒學教授一員從九品訓導四員
未入流陰陽學正術醫學正科僧綱司都綱道紀
司都紀俱從九品副都綱副都紀俱未入流稅課
司分司倉庫局雜造織染局大使俱從九品副使
及茶鹽批驗所茶倉魚課司金銀場局鐵冶所大
使副使俱未入流府州縣巡檢司巡檢從九品水
馬驛丞遞運所大使河泊所官閘官壩官俱未入

流

各州 唐代宗勅刺史有故及闕但令上左依次知
州事隋使府判官爲諸使官屬五代始領郡事爲
州府職今知州一員從五品同知從六品判官從
七品添設無定員若不及三十里長有屬縣者裁
減同知無屬縣者裁減同知判官首領吏目一員
從九品所屬儒學學正一員訓導二員陰陽學典
術醫學典科僧正司僧正道正司道正州縣倉稅
課局茶課司大使副使俱未入流

各縣 周置四百里爲縣官有縣正晉謂之大夫魯

衛謂之宰楚謂之令尹唐大中年裴讓權知縣事
宋以朝官知縣秦置令丞後漢有郡主簿亦曰督
郵隋諸縣始置堂勾稽簿籍今知縣正七品縣丞
正八品主簿正九品添設無定員若不及二十里
長裁革縣丞主簿首領典史一員未入流所屬儒
學教諭一員訓導二員陰陽學訓術醫學訓科僧
會司僧會道會司道會俱未入流

十三省提刑按察司 唐置十道按察使宋轉運使
兼按察使元各道置提刑按察使有副使簽書公
事爲之貳又置經歷知事等員後改肅政廉訪司

今按察使一員正三品副使正四品僉事正五品
添設無定員首領經歷正七品知事正八品照磨
正九品檢校從九品司獄司司獄從九品

都轉運鹽使司

唐置江淮處置轉運使後置諸道

鹽鐵轉運使多以重臣兼領五代置轉運司唐明
皇以崔希逸為轉運副宋京師置都鹽院太祖以
許允言為判官今兩浙兩淮福建山東長蘆河東
鹽運司運使從三品同知從四品判官從六品首
領經歷從七品知事從八品所屬儒學教授從九
品訓導未入流批驗鹽引所鹽課司分司倉庫大

使副使俱未入流

鹽課提舉司 宋熙寧有大都大提舉茶馬事紹興
復置提舉茶鹽司元置都提舉同提舉副提舉等
員今廣東陝西四川雲南鹽課司提舉從五品同
提舉從六品副提舉從七品首領吏目從九品
苑馬寺 今卿從三品少卿正四品寺丞正六品首
領主簿從七品所屬各監監正正七品監副正八
品錄事未入流苑囿長從九品

衍聖公 宣聖襲封衍聖公孔氏子孫正二品司樂
管勾典籍俱未入流孔顏孟三氏教授從九品學

錄未入流

王府長史司

秦置郡丞以佐守在邊爲長史掌兵

馬今王府左右長史正五品首領典簿正九品所屬審理所審理正正六品審理副正七品紀善所紀善正八品典寶所典寶正正八品典寶副從八品典膳所後漢有太子食官隋改爲典膳正今王府因之典膳正正八品典膳副從八品奉祀所奉祀正正八品奉祀副從八品典樂正九品良醫所良醫正正八品良醫副從八品工正所工正正八品工副從八品典儀所元有太子典儀今王府因

之典儀正正九品典儀副伴讀教授俱從九品引
禮舍人倉庫大使副使俱未入流
郡王府典膳正八品教授從九品

中都留守司 唐明皇太原置尹以爲留守謂之三
都留守蓋車駕不在京則置留守今留守正二品
副留守正三品首領經歷司經歷正六品都事正
七品

各都指揮使司 唐兵志曰僖宗幸蜀以神策大將
軍爲都指揮使今都指揮使正二品都指揮同知
從二品都指揮僉事正三品首領經歷司經歷正

六品都事正七品司獄司司獄從九品斷事司斷
事正六品副斷事正七品吏目未入流庫大使從
九品副使草場大使倉副使俱未入流

各衛 漢武初置衛將軍今一衛隸軍五千六百名
指揮使正三品指揮同知從三品指揮僉事正四
品衛鎮撫從六品首領經歷司經歷從七品知事
正九品所屬千戶所隸軍一千一百二十名正千
戶正五品副千戶從五品百戶所隸軍一百一十
名百戶正六品每所設總旗二名小旗十名已上
武官俱世襲惟首領屬官選除

衛學 國朝軍衛無學宣德十年從兵部尚書徐河
之請令天下軍衛獨治一城者皆立學正統以來
天下軍衛延至邊徼建學設教授訓導品秩俸祿
如府學之制

鎮戍 唐制緣邊戎寇之地則加以旌節謂之節度
使武德初邊要之地亦置總管以統軍 國朝凡
天下要害處所專設官統兵鎮戍總鎮一方者曰
鎮守獨守一路者曰分守獨守一城一堡者曰守
備有與主將同處一城者曰協守又有備倭提督
提調巡視等名其官稱掛印事制者曰總兵次日

副總兵曰叅將曰遊擊將軍俱于公侯伯都督都指揮等官內推舉充任

土官宣慰使司 唐以藩方不靖遣重臣宣諭慰安之故有宣慰使之名今宣慰使從三品同知正四品副使從四品僉事正五品首領經歷司經歷從七品都事正八品儒學教授從九品訓導未入流宣撫司學同

宣撫使司 唐有宣撫使宋不常置有軍旅大事則命執政大臣為之今宣撫從四品同知從五品副使從五品僉事正六品首領經歷司經歷從八品知

事正九品

招討使司 唐有招討使用兵權置後以節度使兼之元有招討使副招討今招討從五品招討副正六品首領吏目從九品經歷從七品

安撫司 隋有安撫大使唐以節度使兼之德宗置副使今安撫從五品同知正六品副使從六品兼事正七品首領吏目從九品

長官司 長官正六品副長官從六品吏目教諭訓導俱未入流

蠻夷長官司 長官正七品副長官從七品已上土

官俱世襲惟首領屬官選除

吏員 文獻通考曰西漢開儒吏二途以取人未爲抑揚輕重自後判爲二途儒詆吏爲俗吏諂儒爲迂故拘謗不通者一歸之儒放蕩無耻者一歸之吏而二途皆不足以得人矣

六房 唐張說爲相改政事堂號中書門下列五房于後一曰吏房二曰樞機三曰兵房四曰戶房五曰刑禮旁分以曹官主衆務焉 國朝各衙門立吏戶禮兵刑工六房吏典書辦文移

吏員出身品級 通典曰令史漢官也晉中書有主

書之員齊為主書令史後魏于尚書諸司置主事
令史又尚書有都令史宋太祖知堂吏擅中書事
權多爲奸賍故選授用士人神宗行官制除堂後
官之名于門下省中書省置錄事而已 國朝一

品二品衙門提控都吏通吏出身從七品一品二

品衙門掾吏令史典吏出身正八品內府門吏出

身正八品三品衙門令史胥吏書吏出身從八品

三品衙門典吏四品衙門令史出身正九品四品

衙門典吏五品衙門司吏典吏巡按書吏各道書

吏出身從九品六品七品八品九品并雜職衙門

吏典都察院各道典吏俱出身雜職

事物考卷四終